

Sistema Atensaun no Responde Sedu (AtReS) iha periodu Marsu-Abril 2021 kontinua implementa servisu monitorizasaun ba insidente violénsia ne'ebé akontese, iha Munisipiu rua mak Munisipiu Dili no Munisipiu Likisá. Sistema ne'e hanesan baibain, parseria ho rede monitorizador iha baze atu halibur informasaun kona-ba insidente violénsia sira. Insidente ne'ebé rekolla ona regulármente haruka ba Koordinador Munisipiu sira hodi rejistu iha sistema baze dados nasional ho sistema online. Jestor baze de dados iha nasional uza dados ne'e hodi halo verifikasaun ikus no haruka ba jestor programa hodi analiza ba kauza sira ne'ebé hamosu insidente violénsia ne'ebé akontese. Ba maluk sira ne'ebé iha interese ba dados insidente no atividade prevensaun konfliktu no harii dame comunidade ne'ebé akontese iha Timor-Leste, bele asesu iha www.atres.belun.tl

Revista situasaun periodu Marsu-Abril 2021, kobre iha Munisipiu Dili no Likisá ho postu administrativu lima mak Dili, Postu Administrativu rua no Likisá mak Postu Administrativu tolu. Parseiru monitorizador hamutuk na'in 4 (mane hotu), Postu Administrativu Likisá Vila Koordinadora Munisipiu Likisá mak monitoriza direktamente insidente iha terenu (feto). Dados insidente iha Munisipiu 2 periodu ne'e deskreve tuir mai né'e:

ASUNTU NE'EBÉ PRESIZA TAU ATENSAUN

- ▶ **Violensia envolve membru Grupu Arte Marsial no Arte Rituál hamutuk 7**
- ▶ **Intervensaun PNTL nian ba sidadaun iha tempu serka sanitaria 6**
- ▶ **Violensia domestika no violasaun seksuál hamutuk 6 (Violasaun sexual no abandonu 1, Tentativa ba violasaun seksuál 1 no Violensia domestika 4)**
- ▶ **Insidente Violensia tanba Disputa rai 5**

Total Insidente Munisipiu 2	
Munisipiu	Total Insidente
Dili	47
Likisá	23
Grand Total	70

INSIDENTE VIOLÉNSIA IHA DILI HO LIKISÁ, PERIODU MARSU-ABRIL 2021

Belun ho nia Sistema AtReS iha periodu Marsu - Abril 2021 ho apoiu parseiru husi Rede Asia Pacific Partnership Atrocity Prevention (APPAP), kontinua rekolla dados insidente iha Dili iha postu administrativu Dom Aleixo no postu administrativu Cristo Rei, no Likisá iha postu administrativu Likisá Vila, Bazartete no Maubara. Insidente violénsia ne'ebé akontese iha periodu ne'e, hamutuk 70. Numeru insidente ne'ebe rekolla iha periodu ne'e, entre munisipiu Dili ho Likisá kontinua hatudu persentajen ne'ebe boot liu iha munisipiu Dili ho 67% enkuantu iha Likisa ho 33% husi total insidente 70.

Haree husi sexu perpetrador, iha insidente 52 mak envolve mane, insidente 3 mak envolve feto, 2 mak envolve feto no mane, enkuantu insidente 13 mak la hatene envolvimentu jéneru ka deskoñesidu. Perpetrador nia pozisaun ka status sosial barak liu mak deskoñesidu no seluk

hamutuk 28 (ema deskoñesidu 19 no seluk 9). Tuir fali mak membru familia hela iha uma seluk iha insidente 6, membru Grupu arte marsial iha 7, PNTL, vizifiu, dezempregu, membru familia hela iha uma hanesan hamutuk 16 (ida-idak 4) toos nain no mebru konsellu suku ida-idak 2 no pozisaun sira seluk hanesan F-FDTL- PNTL- ofisial governu, ofisial Governu, Estudante, Mestre, Jornalista no veteranu ida-idak 1. Enkuantu vitima husi insidente ne'e, mane 45, feto 10, no vitima feto no mane hamutuk 12 no deskoñesidu 3.

Sasan ne'ebé uza iha insidente ne'e mak ibun (istori malu, haksasuk malu, diskute malu, sst) 24, isin lolon (ez. liman, ain, nehan hodi tata, sst.) 26, ai dona/ka besi kanu 2, rama ambon ka sasan kroat seluk 4, fatuk 9, isin lolon no fatuk 2, ameasa liafuan ka fiziku hamutuk 17, Katana 1 no seluk hamutuk 2.

Maneira ne'ebé uza barak liu hodi halo violensia iha periodu ne'e mak agresuun fiziku uza iha insidente 25, deskute malun uza iha insidente 21, disturbu publiku iha 6, estraga propriedade iha insidente 3, ameasa verbal iha insidente 2, toda iha insidente 2, violasaun seksuál iha insidente 2, no maneira sira seluk tan mak hanesan provoca, tuda, defamasaun, deskute malun no ameasa, deskonfia sein faktu, obriga jornalista atu halo kobertura ba nia uma ne'ebe hetan mos inundasaun, prende obriga sidadaun ne'ebé halo ezersisiu ho razaun implementa Lei, tolok no estraga propriedade iha insidente sira seluk.

Husi insidente 70 iha periodu ne'e, 81% kauza husi insidente hotu ne'ebé akontese mak insatisfasaun ba hahalok/asaun parte ida nian, deskonfia malu, lanu, kauza husi problema rai, odiu vingansa, problema ekonomia no la halo tuir regra serka sanitaria nian, inkompriensaun, diferenca ideia iha desizaun, iha interese hanesan ba propriedade, irresponsabilidade moral/abandonu, inseguridade no siumentu. Enkuantu violasaun seksuál ne'ebé rezulta gravidez husi vitima, bele akontese tanba habitua. ona ho hahalok ne'e ka problema iha valores etikus. Enkuantu 19 % husi insidente ne'ebé akontese la hatene nia kauza.

Konsekuensia husi insidente sira ne'e mane ida hetan kanek todan, nain 8 hetan kanek kma'an (mane 7, feto 1), uma ka konstrusaun rahun ka sunu 1, uma ka konstrusaun aat 8, transporte estraga, sunu ka aat 1, sasán seluk aat 1.

Husi insidente sira ne'e iha insidente 12 mak monitorizador ka koordinador munisipiu AtReS hanoin katak, insidente violénsia ne'e bele kontinua ka akontese fila fali, tanba problema la tau atensaun ho didi'ak, husi parte seguransa no parte competente sira, odiu vingansa sei kontinua eziste entre parte sira, nune'e bele hamosu insidente iha tempu oin.

INSIDENTE VIOLÉNSIA ENVOLVE MEMBRU GRUPU ARTE MARSIAL NO ARTE RITUÁL IHA DILI HAMUTUK 7

Asaun violensia ne'ebé envolve membru GAM no arte rituál iha periodu ne'e kontinua akontese ho total insidente hamutuk 7 (4 iha Dili namkari iha postu administrativu Dom Aleixo 3, Cristo Rei 1) no 3 iha Likisá (namkari iha Postu administrativu Maubara 2 no Bazartete 1).

Insidente hirak ne'e akontese ho kauza diferente hanesan, insatisfasaun husi hahalok entre parte rua, autor deskonfia vitima, odiu vingansa husi problema pasadu, tanba lanu no asuntu deskoñesidu ida. Husi insidente 7 ne'e mane 3 mak hetan kanek kma'an no tuir observasaun monitorizador no koordenador munisipiu sira katak, insidente bele kontinua iha tempu oin tanba iha insidente ida mak nia kauza deskoñesidu no insatisfasaun bele eziste nafatin wainhira laiha solusaun justu entre parte sira.

Tuir mai mak kronolojia akontesimentu:

- ▶Loron 28-03-2021 mais ou menus oras tuku 10:00 dadeer iha suku Bekora, aldeia Mota ulun, akontese, autór husi Grupu Arte Marsial (GAM) A baku vitima tanba nia konsidera vitima husi GAM seluk, maske vitima hakilar katak, nia la tuir grupu saida de'it, maibe autór sira tuku nafatin. Insidente ne'e hetan intervensaun lalais husi comunidade no PNTL no vitima lori ba klinika Bekora ba kurtivu, no autór lori ba sela PNTL, maibe to ikus vitima perdua sira nia hahalok no husu PNTL atu husik autór sira tanba sira sei iha relasaun familia no tanba sira ajuda inan-aman iha tempu serka sanitaria.
- ▶Loron 30 Abril mais ou menus oras tuku 4:25 madrugada iha aldeia Pande Vou suku Guico postu administrativu Maubara, akontese autór husi GAM A ne'ebé lanu provoka membru husi GAM B ne'ebé mós lanu hotu. Autór husi GAM A tuku vitima maibe la kona, vitima husi GAM B halai ba foti katana hodi lori ba ataka autór maibe autór sira halai tanba comunidade ne'ebé mai hadeer ai-funan, sira mós halai hotu no comunidade balu ba kontaktu PNTL (Ofisial Polisia Suku/OPS) no Xefe suku to'o kedas iha fatin hodi bolu parte rua ne'e, maibe GAM B lakohi kooperera. Too agora kazu ne'e seidauk rezolve, OPS arkivu hela hodi halo aproximasaun ba parte rua hotu hodi buka solusaun.
- ▶Loron 16 Marsu 2021, mais ou menus oras tuku 09:15 dadeer, iha suku Lisadila. Postu administrativu Maubara, Autór ho vitima husi membru GAM A no GAM B hein malu iha basar/merkadu. GAM A provoka GAM B no grupu rua ne'e konsege tuku malu no baku malu. Insidente ne'e akontese tanba liga ho kazu pasadu ne'ebé GAM A ba halo asaltu iha membru GAM B nia uma too uma rahun. Tanba insidente ne'e seidauk rezolve mak parte rua hein malu iha merkadu. Wainhira insidente ne'e akontese, PNTL halo kedas intervensaun no laiha ema ida mak kanek maske sira konsege tuda malu no kazu ne'e entrega ona ba OPS suku hodi rezolve.
- ▶Loron 21 Abril 2021 mais ou menus oras tuku 4:00 loro-kraik, iha suku Maumeta postu administrativu Bazartete, akontese autór husi GAM A ho grupu husi GAM B koko forsa ba malu tanba nain rua ne'e iha ona problema antes. Problema ne mosu tanba joven mane husi GAM A la'o liu husi joven mane ne'ebé husi GAM B ne'ebé hemu hela tua hodi goza dehan Lekirauk, ba ne'ebé? Entaun Vitima sente ofendidu, fila ba sira nain rua diskute malu too sira konsege koko forsa hodi tuku malu iha estrada publiku, maibe viziñu sira ne'ebé hela besik no sira nain rua nia kolega mai hafahe sira hodi hapara atu sira la kontinua tuku malu. Insidente ne'e rezolve kedas iha fatin akontesimentu.

Loron 16 Marsu 2021 mais ou menus oras 04:00 loro-kraik iha suku Fatuhada, postu administrativu, Dom Aleixo, akontese vitima husi Gam A, la'o iha dalan hasoru autór husi GAM B, husu vitima katak, o involve iha GAM A hodi goza ami, maibe vitima hatán dehan ha'u involve duni GAM A maibe seidauk goza malu ho balun husi GAM seluk. Autór la simu entaun tuku vitima nia ibun, no wainhira PNTL to iha fatin akontesimentu, vitima no autór halai namkari.

- ▶Loron 22 Marsu 2021 mais ou menus oras 03:30 loro-kraik iha suku Bebonuk, postu administrativu Dom Aleixo akontese, autór sira halo-an hanesan intelijen ka bufu polisia nian ba kaer vitima sira iha Ai-tarak Laran, tanba deskonfia vitima sira mak kalan ne'e ba baku rahun membru GAM A uza Martelu baku rahun uma no motor, entaun sira lori fali vitima mai iha aldeia refere, autór sira troka malu baku, tuku no basa vitima to'o grave depois mak entrega ba PNTL Postu administrativu Dom Aleixo. Kazu ne'e grave tebes, depois autór kaer no baku halo tan video hodi espalla iha medsos. Perpetrador sira husi insidente ne'e agora daudaun iha ona prizaun preventiva hodi tuir prosesu justica.
- ▶Loron 22 Marsu 2021 mais ou menus oras 12:30 kalan boot iha suku Bebonuk, postu administrativu Dom Aleixo, akontese GAM A atu ataka GAM B iha suku Bebonuk. Maibe la konsege tanba seguransa husi PNTL no F-FDTL la fó fatin tanba fó hela seguransa ba comunidade atu nune'e comunidade labele pániku iha tempu Serka Sanitaria.

INSIDENTE RELASIONA HO INTERVENSAUN PNTL IHA TEMPU SERKA SANITARIA HAMUTUK 6

Iha periodu ne'e asuntu ne'ebé presiza tau atensaun maka, insidente ne'ebé envolve PNTL nia atuasaun ne'ebé hamosu preokupasaun comunidade nian iha periodu ne'e hamutuk insidente 2. Maske nune'e, insidente violensia iha periodu serka sanitaria sai preokupasaun publiku no lamentavel tebes, maske la akontese iha area kobertura sistema AtReS nian. Kronolojia husi insidente ne'ebé akontese liga ba intervensaun PNTL nian mak hanesan tuir mai:

- ▶Iha loron 13 Marsu 2021 oras tuku 8.00 dader iha aldeia Maucocomate, suku Becora Postu Cristo Rei, akontese PNTL ka membru sira baku comunidade ne'ebé lao iha estrada maske comunidade hato'o ona katak, ami osan laiha atu sosa masker maibe PNTL hatan, kuandu masker laiha lalika lao ba mai, hakmatek iha uma. Insidenti ne'e rasik comunidade balun la satisfeito tanba balun aileba buka osan atu sosa foos mak hetan baku husi PNTL.
- ▶Iha loron 13 Marsu 2021 oras tuku 11.00 dadeer iha aldeia Becuse Centro, suku Bekora postu Cristo Rei, akontese PNTL ka membru haksasuk malu ho vitima dosente atu taka atividade eskola maske eskola halo tuir hela regra protokolu saúde mundial nian. Wainhira haksasuk malu, vitima hatán ba PNTL katak, ami hala'o atividade no nafatin

tuir protokolu COVID-19. Maske nune'e PNTL hakilar dehan tenke taka, kuandu la taka ami mak taka odamatan ba imi, no imi hela nafatin iha sala eskola to serka sanitaria remata mak ami foin mai husik imi. Insidente ne'e laiha ema ida intervein tanba PNTL sira hatete sira tuir orden.

- ▶ Iha loron 13 Marsu 2021 mais ou menus oras 17:00 iha suku Bidau Santa-Ana, postu administrativu Cristo-Rei akontese komunidadade ka joventude haksasuk malu ho PNTL ne'ebé tama sai bairu no hetan komunidadade ka joven tiru biliár, wainhira PNTL husu joven atu labele halibur ema barak, maibé vítima hatán, ami mesak maun alin de'it hodi halimar entaun sira hetan siak no haksasuk malu husi PNTL, insidente ne'e la hetan intervensaun husi ema ida tanba PNTL sente implementa lei no orden.
- ▶ Iha loron 14 Marsu 2021 mais ou menus oras 7:00 dadeer iha suku Fatuhada, postu administrativu Dom Aleixo, akontese vítima sira hala'o ezersísiu iha tasi ibun, derrepente membru PNTL sira mai obriga vítima sira tama iha kareta PNTL hodi lori ba PNTL munisipiu Dili. Razaun lori vítima sira tanba la tuir regra serka sanitaria ne'ebé governu bandu atu sidadaun hotu labele sai husi uma laran.
- ▶ Iha loron dia 09 Abril 2021 mais ou menus oras tuku 2:15 lorokraik iha Suku Guico postu administrativu Maubara, akontese dezentendimentu entre autór no vítima kona-ba kazu COVID-19 tanba ne'e mosu diskute malu entre pesoál saúde ho estudante ne'ebé mak identifika ona katak pozitivu ba COVID-19 tanba ne'e família husi estudante nain rua ne'e la simu sira nia oan pozitivu COVID-19 ho razaun se sira nia oan pozitivu nusa família la kona. Iha insidente ne'e pesoál saúde sira la konsege tula no ikus mai parte estudante nain rua kooperera hodi tuir ho motor ba sentru saúde hodi ba sentru izolamentu.
- ▶ Iha loron 27 Abril 2021 mais ou menus oras 10:00 kalan iha suku Bekora, postu administrativu Cristo Rei akontese, PNTL halo seguransa ba serka sanitaria, no wainhira hare vítima hamriik iha estrada bolu taxi atu tula família ba HNGV tanba moras, maibé PNTL sira para kareta no tun baku no tebe vítima to'o monu ba rai, wainhira monu ba rai sira sei baku no tebe to vítima ulun kanek boot, no lori halai ba HNGV. Insidente ne'e iha ona prosesu Justisa.

Iha buat oioin mak sai kauza ba insidente hirak ne'e mak hanesan, insatisfasaun ba hahalok entre parte sira, falla iha valores kultural no responsabilidade moral, asuntu ekonomia (foos atu tein laiha)


Lanu no irresponsabilidade moral. Fatores ne'ebé kontribui ba insidente sira ne'e mak rumor ka odu vingansa no atrasaun no asuntu ekonomia uma laran. Husi insidente 6 ne'ebé akontese, familia husi autor no vitima, membru konsellu suku no kolega mak intervein.

INSIDENTE VIOLÉNSIA TANBA DISPUTA RAI IHA 5

Insidente violensia tanba asuntu rai no propriedade iha periodu ne'e hamutuk insidente 5 iha munisipiu Likisá (Likisá Vila 3, Maubara 2). Insidente ne'ebé akontese iha postu administrativu Likisá Vila mak Disputa rai ba natar fatin 1 no insidente 2 mak disputa rai eransa entre familia. Enkuantu insidente 2 seluk iha postu administrativu Maubara mak insidente liga ba nesesidade loke dalan publiku tanba komunidadade suku ida la konkorda atu husik sira nia rai ba loke dalan publiku no insidente 1 seluk mak hadau malun rai entre komunidadade nain rua ne'ebe tama iha baliza entre aldeia. Fatin akontesimentu mak iha toos, baliza rai no iha uma ida.

Mesak mane de'it mak hanesan autor iha insidente periodu ne'e, enkuantu hanesan vitima fetu ida. Husi insidente 5 ne'e, insidente 3 mak hetan intervensaun husi membru konsellu suku no PNTL enkuantu insidente 2 seluk, ida intervein husi ofisiál governu seluk husi direasaun nasional prevensaun konfliktu komunitariu no insidente ida la iha ema ida mak intervein.





GRAFIKU KARATERÍSTIKA JERÁL INSIDENTE



VIOLASAUN SEKSUÁL NO ABANDONU, TENTATIVA BA VIOLASAUN SEKSUÁL NO VIOLÉNSIA DOMÉSTIKA HAMUTUK INSIDENTE 6

Violasaun seksuál (1), tentativa ba violasaun seksuál (1) no violensia domestika (4) akontese iha periodu ne'e, iha Munisipiu Dili no Likisa, iha postu administrativu Cristo Rei, Dom Aleixo, Bazartete, Likisá no Maubara.

Fatin akontesimentu husi insidente sira ne'e maioria akontese iha uma privadu no ida de'it mak akontese iha fatin seluk (fatin karantina balun iha Dili). Konsekuensia husi violasaun seksuál ne'e fetu menoridade ne'e gravida maibé wainhira fetu husu responsabilidade mane kaben nain ne'e, mane ne'e ignora ka abandona, oan ne'ebe rezultadu husi sira nia relasaun.



ATIVIDADE PREVENSAUN KONFLITU NO HARII DAME

Programa AtReS

- ▶ NGO Belun parseria ho Asia Pacific Partnership Atrocity Prevention (APPAP), liu husi Sistema AtReS, kontinua partIsipa iha formasaun iha loron 1, 3, 8 no 10 fulan Marsu 2021 ne'ebé organiza husi APPAP. Hanesan temi ona iha relatoriu Revista Situasaun periodu Janeiru-Fevereiru, treinamentu ne'e hanesan oportunidade ba membru organizasaun APPAP atu iha interativu ho esepialista sira, defensor no profesionais iha rejaun liga ba prevensaun atosidade nian. Treinamentu ne'e hanesan mos parte ida husi misaun APPAP nian ho parseiru sira hodi tulun dezenvolve kapasidade interesadu sira iha rejaun azia pasifiku. Tema treinamentu iha loron haat temi iha leten mak:

- Atrocities Prevention and Women, Peace and Security (WPS)
- COVID-19: Implications for Atrocities Prevention in the Asia Pacific
- The Future of Atrocities Prevention in the Asia Pacific
- Transitional Justice and Atrocities Prevention

Programa SI-UNW

NGO Belun liu husi Programa Spotlight Initiative no ho apoiu finanseiru husi Uniaun Europeia liu husi UN Women Timor-Leste, pPartisipa iha vizita solidariedade hodi fo apoiu umanitariu ba feto no labarik iha suku Komoro iha aldeia sira: Aldeia 12 Outubru, Bairu Masalidun. No mos iha suku Dare Aldeia Lemorana no iha suku Hera aldeia mota Kiik ne'ebe afetadu husi dezastre natural iha 4 Abril 2021.

Vizita ne'e hahu ho introdusaun husi ekipa KNDL no NGO Belun fahe grupu hodi halo diálogu badak no taka ho distribuisaun ba feto ho labarik sira bazeia ba lista assessment; Feto ho Labarik hamutuk 141(iha Lemorana ema hamutuk 65, iha Masalidun hamutuk ema 61 no iha Mota Kiik hamutuk ema 15), Sasán ne'ebé distribui iha Lemorana mak hanesan sasán ijiene, livru, snack, balde ho biti maibé iha Masalidun no Mota Kiik hetan apoiu umanitaria hanesan sasán ijiene, balde, gayung ho biti.



Fig 1: Domingo 9 Maiu 2021, NGO Belun serbisu hamutuk ho lider komunitaria halo vizita Solidariedade no fó apoiu Umanitaria ba Feto ho Labarik Feto hamutuk 61, ne'ebé hetan afetadu husi Inundasaun Kalamidade, 4 Abril 2021, iha Suku Comoro, Aldeia 12 de Outubru, Bairu Masalidun. (Foto husi Ludgeria Noviana Reiskha)







Fig. 2: Feto ho Labarik feto sira iha Aldeia Lemorana, fahe esperiensi kona-ba sira nia situasaun hasoru Serka Sanitaria no Inundasaun (foto husi Isac Mascarenhas)



Fig. 3: Feto ho Labarik feto sira iha Masalidun, fahe esperiensi kona-ba sira nia situasaun hasoru Serka Sanitaria no Inundasaun (Foto husi Ludgeria Noviana Reiskha)



Fig. 4: Tersa, laron 11 Maiu 2021, NGO Belun hamutuk ho Autoridade Lokál, vizita Solidariedade no apoiu Umanitaria ba Feto no Labarik feto hamutuk 15, ne'ebé afeitadu husi Inundasaun iha Suku Hera, Aldeia Mota Kiik (foto husi Isac Mascarenhas)



Fig. 5: Halo diskusaun badak ho feto maluk sira iha Aldeia Mota Kiik, kona-ba sira nia situasaun hasoru Serka Sanitaria no afeitadu husi Inundasaun (foto husi Isac Mascarenhas)

KONA-BA REVISTA NE'E

Desde estabelesimentu Sistema AtReS iha Belun iha tinan 2008 to'o 2016, sistema ne'e kobre Munisipiu hotu iha Postu Administrativu 43, maibé ho limitasaun finanseiru ne'ebé organizasaun hasoru, iha 2017 sistema ne'e para provizoriu.

Hahú reativa fali iha 2018 ho apoiu husi UN Women ho Programa Feto Pas no Seguransa ho area kobertura ba de'it iha Munisipiu Baukau, Covalima no RAEOA.

Iha mediu 2019 (Maiu – Setembru) kobre tan ba Munisipiu Dili (iha postu administrativu 6) ho apoiu finanseiru husi DAP-DFAT. Iha tinan hanesan, ho apoiu Governu Alemaña, GIZ, sistema AtReS kontinua reativa fali iha Munisipiu 4, Dili, Baukau, Lautein no Vikéke (Posto Administrativu rua kada Munisipiu). Iha 2020 ho apoiu Sekretariadu g7+ reativa iha Munisipiu Likisá no ho apoiu UNDP Programa Sistema Justisa reativa tan iha Munisipiu Covalima. Iha Jullu 2020 tanba limitasaun orsamentu sistema ne'e paradu provosoriamnet to'o Dezembru 2020 no iha tinan 2021 ho apoiu husi Rede Asia Pacific Partnership Atrocity Prevention (APPAP) No reativa fali iha tinan 2021 iha munisipiu 2 iha Dili (postu Administrativu 2) no iha Likisa (Postu Administrativu 3)

Revista situasaun ne'e relata kona-ba asuntu xave relasiona ho insidente violénsia no tendensia husi dadus monitorizasaun liu husi Sistema Atensaun no Responde Sedu (AtReS) Timor-Leste durante Marsu-Abril 2021 iha Munisipiu, Dili, no Likisá. Tuir lolo'os revista ne'e publika iha Fulan Maiu maibé tanba erru tekniku iha website belun nian, estadu emerjensia no serka sanitaria relasiona ho pandemia COVID-19 iha munisipiu Dili no mos kestaun tekniku sira liga ba internet ne'ebé la estavel implika mos ba servisu Sistema AtReS nian iha terrenu, ne'ebé ikus mai implika mos ba publikasaun nee'ebé tarde. Atividade sira ne'e hetan apoiu finanseiru Rede Asia Pacific Partnership Atrocity Prevention (APPAP).

Informasaun kle'an liu iha www.atres.belun.tl

Atu hetan informasaun kléan liu tan kontaktu:

Luis da Costa Ximenes, Diretór Belun, luis.belun@gmail.com

Romaldo Caetano, Jestór Dadus AtReS: romaldo.belun@gmail.com

Jesuina Maria do Rosário Abel, Jestor Programa AtReS, jesuina.belun@gmail.com